

Prome Minister Mike Eman:

Famia Mahtani lo sigui forma parti di historia di Caya Grandi

ORANJESTAD – Prome Minister Mike Eman a declara ayera cu e ta contento di wak con e sector comercial cada dia tin mas y mas confianza den e vision di su Gobierno, especificamente den e renobacion di Oranjestad y Caya Principal.

Otro muestra di esey ta e inversion cu famia Mahtani ta haciendo riba Calypso Building. Den un par di siman, e propiedad lo ta cla pa habri cu su dos tienda ademas di varios otro compania y oficina.

“Di pariba te pabou cambionan importante ta tumando lugar. Naturalmente di infraestructura, pero tambe e tiendanan ta drechando fachada, otro ta restructurando y haciendo inversion.”

Ehempel di esaki cu ya a keda anuncia ta edificio di Nicky Habibe y tambe establecimiento di Penha.

Mientras cu algun luna pasa sector comercial tabata wak cu preocupacion e magnitud di e proyecto di renobacion, awe empresarionan priva ta combenci cu nan na luga di keda man cruza, nan



Premier Eman dunando un man na e labornan di construccion y embeyecimento di e edificio di Calypso

mester capitalisa riba e desaroyo aki, segun e mandatario a indica.

“Awe nos tin cu bisa cu e ambiente y realidad ey a cambia,” Eman a bisa. Famia Mahtani a compronde esey y ta comparti e vision di un caya grandi miho pa e pueblo, pa e turista, pero pa e comerciante tambe. Pesey nan a dicidi di inverti.

E edificio di Calypso lo habri bek aki dos luna unda cu ya nan tin dos huurdo caba pa e localnan, demostrando cu famia Mathani lo sigui contribui na e economia di Aruba.

“Awe cu orguyo nos ta bisa nan ‘ma-sha danki’. Danki pa e confianza den Aruba, danki pa contribui na e restauracion di caya grandi. Cada parti cu boso haci ta un contribucion na e totalidad.

Y boso contribucion awe ta di gran balor pa e gobierno y pueblo di Aruba,” asina Prome Minister Mike Eman a declara den conclusion y prome cu a felicita Minister di Infraestructura, Benny Sevinger pa e bon marcha di e trabounan. □